

Rome Girja Logot Paul He Likha Chithi

Salam

¹ Paul, Jisu Khrista laga ekjon noukar, Tai laga basi luwa manu hobole nimite mati luwa aru Tai laga susamachar koi dibole alag rakhi luwa, ² jun to Tai age din pora bhabobadi khan logot Tai laga kosom to pobitro kotha khan te di dise*, ³ Tai laga Putro dibo nimite kosom diya to, aru kun gaw mangso hisab te David raja laga khandan pora ahise. ⁴ Aru Tai mora pora jee uthi kene Pobitrota laga Atma dwara Tai Isor laga Putro ase eneka hokti pora jonai dise, etu Jisu Khrista amikhan laga Probhu. ⁵ Khrista dwara amikhan anugrah aru apostle hobole paise, aru etu biswas pora kotha mani kene sob desh khan te, Tai laga naam nimite. ⁶ Etu desh khan majote, apnikhan ke bhi Jisu Khrista laga hobole mati kene ase. ⁷ Etu chithi to Rome te thaka sob jonke, Isor pora morom kora khan, jun khan ke pobitro hobole nimite likhise. Apuni khan logot anugrah hobi aru amikhan Baba Isor aru Probhu Jisu Khrista pora anondo hobi.

Rome Te Jabole Itcha Kora

⁸ Shuru te, moi apnikhan nimite Jisu Khrista dwara Isor ke dhanyavad di ase kelemane apuni khan laga biswas to duniya laga sob jagate

* **1:2** 1.2 Old Testament koi ase. Mat. 21.42; 22.29; 26.54; John 5.39; 2 Tim. 3.15.

prochar kori ase. ⁹ Kelemanee Isor moi laga gawahi ase, kunke moi sewa kore moi laga atma pora, Tai Putro laga susamachar nimite, aru kineka moi narokhi kene apuni laga kotha koi ase. ¹⁰ Moi laga prathana te apuni khan ke yaad kori kene Isor laga itcha hoile ki hoilebi apnikhan usorte ahibo karone moi hodai prathana kori ase. ¹¹ Kelemanee apnikhan ke dikhi bole bisi itcha ase titia apnikhan ke atma te takot hobo nimite atma laga bordan bhag kori dibo. ¹² Titia amikhan eke logote nijor biswas pora ekjon-ekjon laga atma uthai di thakibo. ¹³ Aru etiya, bhai khan ke etu najani kene thakibo dibole mon nai, moi apnikhan logote ahibo nimite bisi bar taiyar korise, (kintu etiya tak kiba ekta pora moike hodai rukhai thakise), jineka Porjati khan pora ami bhal bijon kati bole paise, thik etu nisena ami apnikhan majot te bhi bhal bijon katibo dibole itcha ase. ¹⁴ Moi Yunani jati aru dusra desh manu, gyaan thaka aru murkho manu khan sob logote dhar bukhi kene ase. ¹⁵ Etu karone, Rome te thaka apnikhan sob logote susamachar prochar kori bole moi bisi itcha ase.

Dharmik Khan Biswas Pora Jinda Thakibo

¹⁶ Kelemanee moi susamachar nimite sorom nakore, kun he etu ke biswas kore taikhan sob nimite etu poritran pabole laga Isor laga hokti ase, shuru te Yehudi khan karone, etu pichete Yunani khan nimite†. ¹⁷ Kelemanee susamachar te Isor laga dharmikta to biswas pora biswas uporte dikhai di ase, Shastro te eneka likhi

† **1:16** 1.16 2 Tim. 1:8.

kene thaka nisena, “Hosabi, dharmik manu khan biswas pora jinda thakibo‡.”

Adharmik Uporte Isor Laga Khong

¹⁸ Kelemanе sorgo pora Isor laga khong adharmik manu khan sob uporte ahi thaka dikhai dise. ¹⁹ Etu eneka ase kelemanе Isor laga ki janikena ase, etu taikhan suku pora dikhibo pari ase. Kelemanе Isor nijor pora taikhan ke dikhai dise. ²⁰ Kelemanе suku pora dikhibo napara Tai laga gunn, Tai laga anonto hokti aru sobhab, pura shristi bona din pora sob dikhai dise aru ki bonaise etu pora bujhai dise. Etu karone manu khan pora etiya najane eneka kobo napare§. ²¹ Etu eneka hoise kelemanе, Isor ke janile bhi, taikhan pora Isor ke kineka mohima koribo lage etu kora nai, nohoile dhanyavad diya nai, kelemanе taikhan karone etu bhabona to eku kaam thaka nai aru taikhan laga murkho mon to andhera hoi kene thakise. ²² Gyaani ase eneka bhabi kene taikhan murkho hoise*. ²³ Aru kitia bhi namora Isor laga mohima ke mori jabole manu laga protima logote bodli kori loise; chiriya khan, theng pora ja janwar khan aru pet pora ja janwar khan laga murti bonai loise†.

²⁴ Etu karone Isor taikhan nijor laga letera aru sapha nathaka mon laga itcha te jabole dise, aru taikhan laga gaw to taikhan majote moila kori thaki bole nimate. ²⁵ Taikhan Isor laga hosa kotha to misa logote bodli kori dise, aru juntu Isor pora

‡ **1:17** 1.17 Hab. 2:4; Gal. 3:11. § **1:20** 1.20 Job 12:7-9; Psa. 19:1. * **1:22** 1.22 Jer. 10:14. † **1:23** 1.23 Deu. 4:15-19; Psa. 106:20.

bonaise, etu ke sewa korise, aru sob sristi Bona-Jonke nohoi, jun laga mohima hodai nimate ase‡. Amen.

²⁶ Etu karone, Isor pora taikhan ke mangso itcha laga biya kaam te taikhan ke chari dise, kele koile taikhan laga maiki khan bhi niyom te ki ase etu nohoikena ki nohobo lage etu he itcha korise.

²⁷ Etu nisena, mota khan bhi taikhan laga maiki khan logot ki niyom koribo lage etu nohoikena, dusra mota khan logote niyom te nathaka letera kaam kori ase, aru taikhan nijor etu letera kaam kora laga saja paise§.

²⁸ Kelemanee taikhan to Isor taikhan logote ase koi kene mana nai, etu pora Isor he taikhan ke biya bhabona kora manu khan laga hathte di dise, kun to kaam khan thik nohoi eitu khan kori bole nimate. ²⁹ Taikhan sob adharmikta pora bhorta hoi kene ase, biya kaam kora manu, lalchi kora manu, aru dusra ke dukh kori bole diya manu. Taikhan suku jola pora bhorta hoi kene ase, morai diya, khong uthi kene kotha namila, manu ke thogai diye, aru biya bhabona kori thake. Taikhan manu laga biya kotha koi thake, ³⁰ manu laga bhirodh te misa kotha koi, Isor ke ghin kore, manu ke hisab nakore, nijorke he bhal bhabe, phutani kore, biya kaam kori bole nimate rasta bisari thake; aru taikhan baba ama laga kotha namane. ³¹ Taikhan eku chinta bhabona nai, biswas nathaka manu, mon biya manu aru morom nathaka manu khan ase. ³² Taikhan Isor laga dharmik kaam khan jane, kun etu

‡ 1:25 1.25 Jer. 13:25; 16:19. § 1:27 1.27 Lev. 18:22, 20:13.

biya kaam khan koribo taikhan moribo. Kintu taikhan khali eitu khan kora nohoi, hoilebi kun manu biya kaam kori ase taikhan laga mon bhi eneka kaam khan kori bole mon dangor kori diye.

2

Isor Laga Dharmik Bisar

¹ Etu karone apuni khan logote bahana kori bole eku nai, O manu, kun dusra ke bisar kore, jitia apuni dusra ke bisar kore, titia apuni nijor logote thaka golti ke bhi bodnam kori ase. Kelemanee apuni kunkhan bisar kore, thik utu khan nisena he kore. ² Kintu Isor utu khan ke bisar kore jun khan eneka kaam khan kore aru amikhan jani ase Tai laga bisar to hosa ase. ³ Kintu bhabi sabi, apuni khan jun dusra ke bisar kore, utu golti khan nimite juntu apuni khan bhi kore. Tinehoile apnikhan Isor laga bisar pora bachibole paribo naki? ⁴ Isor laga morom laga dhun juntu apuni khan uporte rakhi kene ase, aru Tai bisi dhorjo kori kene etiya tak saja nadiya karone, apnikhan eitu khan bisi chutu ase koi kene bhabi ase naki? Apuni khan najane naki, Tai laga morom to apuni khan ke mon ghurai lobole nimite ase koi kene? ⁵ Kintu apuni khan bisi mon tan ase aru mon naghurai kene ase, etu nimite apuni khan nijor laga golti khan Isor laga khong laga din nimite joma kori ase. Aru utu dinte Isor laga hosa bisar sob manu khan ke dikhai dibo. ⁶ Isor pora sob manu laga kaam

hisab te taikhan ke dibo*: ⁷ Jun manu khan bhal kaam korate dhorjo kori kene mohima aru sonman aru biya kaam kora laga jibon bisara nai, taikhan ke Isor pora anonto jibon dibo. ⁸ Kintu jun manu nijor nimate he bhabona kore aru hosa kotha namani kene adharmik phale he mani loi, taikhan karone Isor laga khong aru ghusa ahibo. ⁹ Isor pora paap kora manu khan sob uporte dukh kosto anibo, poila Yehudi khan ke, aru etu pichete Yunani khan uporte bhi. ¹⁰ Kintu kun pora bhal kaam kori ase, taikhan nimate to mohima, sonman aru shanti thakibo poila Yehudi khan aru etu pichete Yehudi khan nimate bhi.

¹¹ Kelemanee Isor to sobke eke sai†.

Isor Laga Bisar Aru Kanun

¹² Kilekoile niyom najani kene kiman jon paap korise taikhan eneka he harai jabo aru kiman jon niyom janikena paap korise taikhan etu niyom hisab pora bisar koribo. ¹³ Kilekoile niyom huna pora Isor age te dharmik nohoi, kintu niyom chola pora he taikhan dharmik hobo. ¹⁴ Kelemanee jitia Porjati khan, kunkhan logot niyom nai, taikhan laga sobhab pora he niyom te ki koi ase etu korise koile, taikhan niyom nathakile bhi taikhan nijor he niyom ase. ¹⁵ Eneka sobhab thaka pora niyom te ki hukum dise etu taikhan laga monte likhi kene ase eneka dikhai ase. Taikhan laga nijor bhabona pora bhi etu thik ase eneka sakhi di ase, aru taikhan mon pora kitia ba galti diye aru kitia ba thik ase eneka

* **2:6** 2.6 Psa. 62:12, Pro. 24:12. † **2:11** 2.11 Deu.10:17, 2 Chr. 19:7.

koi. ¹⁶ Etu hobo utu dinte jitia Isor he manu khan laga lukai kene thaka sob bisar koribo, moi ki susamachar koi ase etu hisab pora hobo, Jisu Khrista dwara.

¹⁷ Kintu jodi apuni nijorke Yehudi mati ase aru niyom te asha kori ase aru Isor laga manu eneka mon dangor kori ase, ¹⁸ aru Tai laga itcha jane aru ki bisi bhal ase etu ke mane kele koile apuni ke niyom pora bujhai dise; ¹⁹ aru apuni hosa bhi andha khan nimate nijor bhi ekjon cholawta ase eneka jane, nohoile andhera te thaka khan nimate puhor ase eneka jane, ²⁰ murkho khan nimate hikhok ase eneka jane, bacha khan laga hikhok ase eneka koi, aru apuni logote niyom to gyaan aru hosa ase koile, ²¹ titia apuni kun dusra ke sikhai ase, apuni nijorke bhi nasikhai naki? Apuni kun chor kora laga bhirodh te prochar kore, apuni chor kore naki? ²² Apuni koi ase bebichar na koribi kintu apuni bebichar kori ase naki, apuni murti to ghin kori ase kintu mondoli pora chor kori ase naki? ²³ Apuni kun pora niyom te phutani kori ase niyom to bhangai kene Isor ke sorom khilai ase naki? ²⁴ Keleman Shastro te eneka likhi kene ase, "Apnikhan nimate Porjati majote Isor laga naam to ninda kori ase§." ²⁵ Keleman jodi apuni niyom thik pora manile, sunnot korate labh ase, kintu jodi apuni niyom to bhangai ase koile apuni sunnot nakora nisena he ase*. ²⁶ Jodi, ekjon manu sunnot kora nai kintu niyom te thaka sob manile tai asol te sunnot nakorilebi tai sunnot kora

‡ 2:21 2.21 Mat. 23:3. § 2:24 2.24 Isa.52.5, Eze. 36:20. * 2:25 2.25 Jer. 4:4.

nisena nahobo naki? ²⁷ Sunnot nakora khan kun niyom mani ase taikhan pora apuni khan kun sunnot korise aru niyom bhi paikene ase, kintu niyom bhangai ase, apuni khan ke ninda koribo naki? Etu eneka ase kelemane apuni khan logote likhi kene thaka niyom aru sunnot ase, hoilebi apuni khan niyom ke bhangai! ²⁸ Etu pora tai ekjon to Yehudi nohoi jodi khali bahar te he tai Yehudi ase; aru khali dikha bole nimite gaw mangso te sunnot kora to thik nohoi. ²⁹ Kintu asol Yehudi to kitab te likhi thaka niyom mani luwa etu ekla nohoi, kintu mon bhitor te sunnot hobo lage, Atma pora. Etu manu nimite stuti to manu pora nahibo, kintu Isor pora ahibo†.

3

Isor Laga Dharmikta Uthabo

¹ Tinehoile Yehudi huwa labh to ki ase? Nohoile sunnot kora labh to ki ase? ² Sob phale labh ase. Kelemane, prothom te, Yehudi khan ke Isor laga prokahit jonai dibole nimite dise. ³ Nohoile kunba Yehudi khan biswas nathaka asele naki? Nohoile taikhan kunba biswas nakora karone Isor laga hosa to harai jabo naki? ⁴ Kitia bhi nohoi. Ulta, sob manu misa hoile bhi Isor to hosa he thakibo. Etu nimite Shastro te likha ase, “Apuni kotha kowa to hosa ase eneka janibo, Aru jitia apuni ke bisar koribo apuni bisar te jiti jabo*.”

⁵ Kintu jodi amikhan adharmik thaka pora Isor laga dharmikta dikhai di ase koile, titia amikhan

† 2:29 2.29 Phi. 3:3. * 3:4 3.4 Psa. 51:4, 116:11.

pora ki kobo? Amikhan uporte khong utha nimate Isor he adharmik hoise naki? (Moi manu hisab te koi ase). ⁶ Kitia bhi nahobo! Jodi eneka hoile kineka Isor pora prithibi bisar koribo? ⁷ Kintu jodi moi misa kowa karone Isor laga hosa to mohima kori kene bisi ulai ase, titia kele moike etiya tak paap-pi manu nisena bisar kori ase? ⁸ Aru kele eneka nakoi, jineka amikhan pora kori ase koi kene misa kotha ulai ase, aru kunba pora amikhan eneka koise koi kene sakhi kori ase, "Ahibi amikhan biya kaam koribo, aru bhal bisi ulabo nimate"? Taikhan uporte bisar kora to thik ase.

Kun Manu Bi Dharmik Nohoi

⁹ Tinehoile ki? Amikhan nijorke maph kori ase naki? Kitia bhi nohoi. Kelemane amikhan pora Yehudi aru Yunani khan, taikhan sob, paap te ase koi kene bodnam di dise. ¹⁰ Shastro te eneka likhi kene ase:

"Kun bhi pobitro nohoi, ekjon bhi nai†.

¹¹ Kun pora bhi nabuje.

Kun pora bhi Isor ke nibisare.

¹² Taikhan sob ghurai kene jai jaise. Taikhan eke logote eku kaam nathaka hoise.

Kun pora bhi bhal nakora hoi jaise- ekjon bhi nai‡."

¹³ "Taikhan laga gola to khula thaka kobor nisena ase.

Taikhan laga jiba to thogabole cholai ase.

Taikhan laga mukh te saph laga jeher ase§."

¹⁴ "Taikhan laga mukh te biya kotha aru tita he ase."

† **3:10** 3.10 Ecc. 7:20. ‡ **3:12** 3.12 Psa. 14:3, 53:1 § **3:13** 3.13 Psa. 5:9, 140:3

15 “Taikhan laga theng bhi khun gira bole ekdom joldi jai.

16 Taikhan bera rasta to nosto aru dukh he ase.

17 Etu manu khan to shanti laga rasta najane*.”

18 “Isor ke bhoi kora taikhan laga suku age te ekdom nai†.”

19 Amikhan jane niyom te ki koi ase, etu niyom te thaka manu khan nimite he koi ase. Titia sob manu laga mukh to bondh hobo aru pura prithibi to Isor age te galti hobo. 20 Kelemaney niyom laga kaam kora pora tai age te kun manu bhi thik nohobo. Kelemaney niyom dwara he paap ki ase etu jani ase‡.

Kunbi Dharmik Nohoi

21 Kintu etiya Isor laga dharmik kotha to niyom chari kene dikhai di ase. Aru etu to Bhabobadi khan aru Niom te likha khan pora sakhi dise, 22 juntu ase, Isor laga dharmikta to Jisu Khrista ke biswas kora manu sob nimite ase. Kelemaney eku alag-alag kori kene nai. 23 Kilekoile sob manu paap korise aru Isor laga mohima napuncha hoi jaise, 24 aru Tai laga anugraha pora eku daam nadikena taikhan basi loise, juntu udhar kora Jisu Khrista te ase. 25 Kilekoile, Isor pora Khrista ke daan dibole rasta bonaise Tai laga khun te biswas rakha dwara pora. Tai laga dharmikta dikhai dibole nimite, Khrista ke dise, kelemaney Tai pora age te kora paap sob maph kori dise 26 Isor laga dhorjo thaka nimite. Etu aji amikhan ke tai laga dharmikta dikhai dibole karone thakise. Titia Tai hosa ase eneka jonai

* **3:17** 3.17 Isa. 59.7-8 and Pro. 1.16. † **3:18** 3.18 Psa. 36:1.

‡ **3:20** 3.20 Psa. 143:2.

dibo aru kun pora Jisu ke biswas kore taikhan ke bhi bachai lobo.

²⁷ Titia amikhan phutani kori bole ki ase? Etu hatai se. Ki laga niyom pora? Kaam kora pora naki? Nohoi, kintu biswas kora niyom pora he hoise. ²⁸ Keleman e amikhan pora jani loise niyom laga kaam kora nohoi kene biswas pora he bachaise. ²⁹ Nohoile Isor to khali Yehudi khan laga Isor ase naki? Tai he Porjati laga bhi Isor nohoi naki? Hoi, Porjati laga bhi Isor ase. ³⁰ Jodi, hosa pora, Isor to ekjon he ase, Tai pora sunnot huwa khan ke biswas pora bachabo aru sunnot nohua khan bhi biswas dwara he bachabo.

³¹ Tinehoile amikhan biswas kora karone niyom to chari dibo naki? Eneka kitia bhi nahobi! Etu laga bodli, amikhan pora niyom to dhuri rakhibo lage.

4

Biswas Pora Abraham Dharmik Hoise

¹ Tinehoile Abraham, kun mangso hisab te tai amikhan laga baba ase, ki paise koi kene kobo?

² Kilekoile jodi Abraham bhi kaam kori kene dharmik hoise koile tai nijor phutani hobole kiba ase, kintu Isor usorte hoile nohoi*. ³ Keleman e Shastro te ki koise? "Abraham pora Isor ke biswas korise aru etu pora tai dharmik hoise†."

⁴ Etiya kun pora kaam kori ase tai laga hajira to udhar nisena ginti nohoi kintu tai pabole thaka he ase. ⁵ Kintu kun ekjon nijor to kaam nakore, hoilebi, paap-pi manu khan ke bachai diya Isor ke biswas kore, tai laga biswas to dharmik ase koi

* **4:2** 4.2 Gen. 15:6. † **4:3** 4.3 Gen.15:6.

kene ginti kori loi. ⁶ Etu manu nimite he David pora koi ase, kaam nathakile bhi kunke Isor pora dharmik ase eneka ginti korise, tai asishit ase.

⁷ Tai koise,

“Asis ase taikhan jun khan laga golti kaam khan maph hoise,

Aru jun khan laga paapkhan dhakai dise.

⁸ Dhonyo ase utu manu junke Probhu pora tai laga paapkhan ginti nakoribo‡.”

⁹ Etu asirbad to khali sunnot huwa khan nimite ase naki, na sunnot nakora khan karone bhi ase? Keleman amikhan koi, “Abraham laga biswas he dharmikta ase koi kene ginti hoise.”

¹⁰ Tinehoile etu kineka ginti hoise? Etu tai sunnot nakora age te hoise na, na sunnot huwa pichete hoise? Etu to sunnot kora pichete nohoi, kintu nakora age te hoise. ¹¹ Abraham ke sunnot laga niyom laga chihna to pai loise. Etu to dharmikta biswas laga mohor hoise juntu tai sunnot nakora age te Isor pora taike di dise. Etu nimite Abraham ekjon baba hoi jaise jun biswas kori loise, jodi taikhan sunnot nakorile bhi. Etu motlob to taikhan dharmik ase koi kene taikhan ke ginti kori lobo§. ¹² Aru Abraham taikhan laga baba bhi ase jun khan sunnot korise, kintu khali sunnot kora niyom he mana karone nohoi, hoilebi taikhan jun amikhan laga baba Abraham pora sunnot nakora age te tai laga biswas laga kadam ke piche korise.

Biswas Pora Isor Laga Dharmikta Pabo

‡ 4:8 4.8 Psa. 32:1-2. § 4:11 4.11 Gen. 17:11.

13 Kilekoile Abraham aru tai laga khandan ke tai etu prithibi laga malik hobo koi kene kosom diya to khali niyom mana nimite he nohoi, kintu biswas laga dharmikta dwara ase. 14 Kilekoile jodi manu khan khali niyom mani kene Isor laga kosom pai jai, tinehoile biswas laga eku motlob nathakibo. Aru Isor laga kosom Abraham ke diya to eku kaam nai. 15 Kilekoile niyom to khali Isor laga khong he anibo, kintu jodi niyom nathake koile, ta te niyom laga bhirodh te eku kori bole nai. 16 Etu karone khali biswas pora he manu khan Isor laga kosom to pabo, eneka hoile manu khan Isor laga kosom to anugrah pora ase aru Abraham laga sob khandan khan etu kosom to pabo- khali niyom te thaka khan nimite nohoi, kintu jun khan Abraham laga biswas ke piche kore, eitu khan bhi pabo. Tai amikhan sob laga baba ase, 17 jineka Shastro te likhi kene ase, "Moi tumike bisi desh laga baba bonaise." Aru Abraham to Isor, Junke tai biswas korise, Tai logote thakise, jun mora ke jibon diye aru utu jinis khan bhi bonai jun to kitia bhi thaka nai*.

18 Abraham laga bacha hobo koi kene tai eku asha thaka nai, kintu Abraham Isor ke biswas kori kene asha rakhise. Aru etu nimite tai bisi desh laga baba hoise, jineka Isor pora taике koise, "Tumi laga khandan bisi hobo." 19 Abraham tai nijor laga gaw ke komjur pora mori ase koi kene bhabi thakise (kele koile tai laga umor to eksoh saal laga aas-pas te hoi jaise)- aru tai laga maiki Sarah to kitia bhi bacha nabukhibo koi kene bhabi loise, kintu Abraham to biswas te kitia

* 4:17 4.17 Gen. 17:15.

bhi komjur kora nai[†]. ²⁰ Kintu Isor laga kosom nimate, Abraham kitia bhi biswas te mon chutu kora nai. Ulta, tai nijorke biswas te aru bhi takot korise aru Isor ke prosansa dise. ²¹ Abraham pora biswas kori loise Isor juntu taikhe kosom dise, etu tai pai jaise. ²² Etu karone Abraham to Isor logote dharmikta ase koi kene ginti kori loise‡. ²³ Etiya taikhe grohon kori loise eneka likhi kene thaka to khali Abraham nimate nohoi. ²⁴ Kintu amikhan nimate bhi likha ase, amikhan nimate bhi ginti hobo, kele koile amikhan bhi biswas ase utu ekjon ke jun pora Jisu Khrista ke mora pora jinda uthai dise. ²⁵ Jisu ke amikhan laga paap nimate taikhan laga hathte dise aru amikhan ke dharmik hobo nimate Taike mora pora jinda kori dise.

5

Biswas Dwara Isor Logot Shanti

¹ Etu karone biswas pora amikhan dharmik hoija karone etiya Probhu Jisu Khrista dwara Isor logote amikhan shanti te ase. ² Tai dwara biswas te amikhan anugrah pai ase kot te amikhan khara kori ase, aru Isor laga mohima laga asha te amikhan khushi kori ase. ³ Aru etu uporte amikhan laga dukh kosto te bhi khushi kori ase kelemane amikhan jani ase kosto pora he dhorjo ulai. ⁴ Kintu aru dhorjo pora adat ulai aru adat pora asha ulai, ⁵ aru asha pora amikhan ke sorom nadibo kelemane Pobitro Atma kun amikhan ke dikene ase Tai dwara

[†] **4:19** 4.19 Heb. 11:11. [‡] **4:22** 4.22 Gen. 15:6.

amikhan laga monte Isor laga morom bhorta hoi ase. ⁶ Kelemanee kitia amikhan komjur thakise etu thik somoite paapi manu khan nimite Khrista morise. ⁷ Kelemanee dharmik manu ekjon nimite kunba mori bole monjur nohobo. Kintu, ki jane, bhal manu ekjon karone kunba mori bole monjur hobo pare. ⁸ Kintu Isor he amikhan karone Tai laga morom dikhai dise, kelemanee kitia amikhan paapi thakisele, titia Khrista amikhan nimite morise. ⁹ Aru etu pora bhi, etiya to, Khrista laga khun pora amikhan dharmik hoi thaka nimite, Tai laga khun pora he amikhan ke Isor laga khong pora bhi bachai lobo. ¹⁰ Kelemanee amikhan jitia Isor laga dushman khan thakise, titia Tai laga Putro mori bole dikena Isor pora Tai logot amikhan ke mil milap kori loise, etiya hoile, Tai logote mil milap kori luwa pichete, Tai laga jibon pora, aru bhi poritran amikhan pabo. ¹¹ Etu he nohoi, Probhu Jisu Khrista dwara amikhan Isor logot te khushi ase kelemanee Tai dwara, Isor logot te amikhan etiya mil milap kori loise.

Adam Pora Mora, Khrista Pora Jibon

¹² Etu karone, kineka manu ekjon pora prithibi te paap anise, aru paap pora mora anise, etu nisena mora to manu khan sob logote ahi jaise, kelemanee sob pora paap korise. ¹³ Kelemanee niyom nadiya age te, paap to prithibi te thakise, kintu niyom nathaka karone paap ke ginti kora nai. ¹⁴ Hoilebi, mora to Adam pora Moses tak raj korise, taikhan uporte bhi kunkhan Adam nisena

kotha namana paap kora nai, aru kun he ekjon ahibole thaka laga noksa asele.

¹⁵ Hoilebi uphar to niyom bhirodh te ja nisena nohoi. Kilekoile, jodi, ekjon manu pora bhirodh kora nimite bisi morise koile, kiman dangor Isor laga anugrah aru ekjon manu, Jisu Khrista, laga anugrah pora uphar aha kiman bisi manu pora paise! ¹⁶ Aru etu uphar to ekjon paap kora laga anjam nimite diya nohoi. Kilekoile, ekta galti kora pora bisar ahise aru bodnam bhi anise, hoilebi uphar pora bisi galti kora pichete bhi, aru eku galti nai koi kene faisla hunai se. ¹⁷ Kilekoile jodi, ekjon manu laga galti nimite sob uporte mora pora raj kore, taikhan etu pora bhi kiman dangor anugraha aru dharmikta laga inam pabo ekjon pora, kun Jisu Khrista ase. ¹⁸ Etu karone kineka ekjon laga paap pora sob manu uporte sajai anise, etu nisena he ekjon dharmik kaam pora sob manu karone jibon aru dharmikta anise. ¹⁹ Kelemanek ekjon kotha namana pora kineka bisi manu ke paapi bonaise, etu nisena ekjon pora kotha mani luwa pora bisi manu dharmik bonai dise. ²⁰ Kintu niyom to paap bisi ulai dibole anise. Kintu kot te paap bisi ulai ase, Isor laga kripa aru bhi bisi ulai ase. ²¹ Eitu khan huwa karone to, jineka paap pora mora khan ke raaj korise, etu nisena anugrah bhi amikhan laga Probhu Jisu Khrista logote anonto jibon te raj koribo.

6

Paap Te Morise, Isor Logot Jinda Hoise

¹ Titia amikhan pora ki kobo? Anugrah bisi ulabo nimite paap te he thakibo naki? ² Kitia bhi etu hobo nadibi. Amikhan kun paap te mori jaise, kineka aru ta te he thakibo? ³ Amikhan kun Jisu Khrista logot te baptizma loise eitu khan sob Tai laga mrityu te bhi baptizma loise eneka apnikhan najane naki? ⁴ Etu karone, etiya to, mrityu te baptizma luwa dwara amikhan Tai logote mati bhitor te di dise. Aru etu pora he, jineka Baba Isor laga mohima pora Khrista mora pora jinda hoise, tineka amikhan bhi notun jibon te berabo karone. ⁵ Kelemanee jodi Tai mora te amikhan bhi Tai logote ekta hoi kene morise koile, titia Tai jee utha te bhi Tai nisena amikhan bhi jinda hobo. ⁶ Amikhan etu jani ase, amikhan bhitor te thaka purana manu to Tai logote Cross te morai dise, titia hoile he paap laga gaw to khotom hobo. Eneka hoile he amikhan paap laga noukar aru nahobo nimite. ⁷ Kelemanee kun morise tai paap pora mukti paise aru tai dharmik hoise eneka koi. ⁸ Kintu jodi amikhan Khrista logot morise koile, Tai logot te amikhan bhi jinda thakibo. ⁹ Amikhan jani ase Khrista ke mora pora uthai dise, Tai aru bhi namoribo; mrityu to Tai uporte adhikar nathaka hoise. ¹⁰ Kelemanee Tai kineka mrityu te morise, etu mrityu dwara etu paap ke ekbar te hodai nimite morise. Kintu ki jibon te Tai jinda ase, etu to Isor nimite he ase. ¹¹ Etu nisena he, apuni bhi nijor pora paap te morise, kintu Jisu Khrista dwara Isor logote jinda ase eneka mani lobo lage.

¹² Etu karone paap laga itcha ki ase etu mani

kene paap pora apuni mori bole laga gaw te hukum chola bo nadibi. ¹³ Apuni laga gaw te alag-alag bhag to paap logote adharmik kaam koribo nimate hathiar nisena nadibi. Kintu mora pora jinda kora manu nisena apuni nijor pora Isor logote di dibi aru apuni laga gaw bhag to Tai hathte dharmik kaam nimate hathiar ekta nisena chola bole dibi. ¹⁴ Aru paap ke apuni uporte hukum chola bole nadibi. Kelemane etiya to apnikhan niyom pora nohoi, kintu anugrah pora thaki ase.

Dharmikta Te Sewak Hoise

¹⁵ Tinehoile ki hobo? Amikhan niyom te nohoi kene anugrah te thaka karone aru paap to kori thakibo naki? Kitia bhi eneka hobo nadibi. ¹⁶ Apuni najane naki jodi kunba manu laga agya mani kene noukar hobole apuni nijorke di dile, apuni kun laga kotha huni ase, apuni tai laga noukar nohoi? Etu hosa ase, jodi apuni paap laga noukar ase ki pora mora te loijai, nohoile kotha mani luwa laga noukar ase juntu pora dharmik hobole di ase, hoilebi apuni kun laga agya mani ase tai laga noukar ase. ¹⁷ Kintu Isor ke dhanyavad di ase! Kelemane ekbar paap laga noukar hoi thakise, kintu apnikhan etiya to mon sob pora kotha mani loi kene ki bhal agya sikhai dise ta te thik thaki ase. ¹⁸ Aru paap pora mukti pa-a nisena thik dharmikta laga noukar khan ase. ¹⁹ Moi manu hisab te he kotha koi ase kelemane apuni khan bujhi bole komjur ase. Kelemane jineka apnikhan poila te niyom namana laga noukar hoi kene thakise, aru bisi biya hoijai thakise, thik etu nisena, etiya

to apuni laga gaw to dharmikta laga noukar hobole dibi, etu pora gaw to pobitro hoi jabo. ²⁰ Kitia apnikhan paap laga noukar thakise titia dharmikta apuni khan logote thaka nai. ²¹ Kintu etu somoite, apnikhan pora ki phol paise eitu khan nimite etiya to apuni khan sorom kori ase? Keleman eitu khan jinis pora to khali mrityu he ani diye. ²² Kintu etiya to apnikhan paap pora mukti paise aru Isor laga noukar hoi jaise, etu laga phol to hoile apnikhan ke bisi pobitro bona bole laga ase aru etu pora anonto jibon pabo. ²³ Keleman paap laga daam to mrityu ase, kintu Isor pora diya inam to hoile Probhu Jisu Khrista te anonto jibon ase.

7

Kanun Pora Mukti

¹ Nohoile bhai khan, apuni khan pora najane naki (keleman kun niyom jani kene ase taikhan logote moi koi ase), ekjon manu jinda thaka tak niyom pora taike bandi kene thake? ² Keleman, ekjon shadi kori kene thaka maiki to tai laga mota jinda thaka tak tai laga niyom hisab te thake, kintu jodi tai laga mota mori jai, titia tai shadi kori kene thaka niyom pora ajad hoijai. ³ Thik etu nisena, jodi tai mota jinda thaki kene, dusra ekjon logot thaki jaile taike bebichari eneka kobo. Kintu jodi tai laga mota mori jai, tai niyom pora ajadi paise aru etu pichete, jodi tai dusra mota logot shadi korile bhi, tai bebichar nohoi. ⁴ Etu nisena, moi laga bhai khan, apuni khan ke bhi Khrista laga gaw dwara niyom te

mori jaise. Etu huwa pora, Tai kunte mora pora jinda hoise, Tai logot te amikhan ekjon-ekjon milai loi kene, amikhan Isor nimate phol dhoribo karone ase. ⁵ Kelemanee kitia amikhan gaw mangso te thakise, niyom pora amikhan paap laga itcha to uthai dikene, amikhan laga gaw alag-alag bhag te kaam kori thakise aru etu pora mora laga phol dhuri thakise. ⁶ Kintu ki pora amikhan ke dhuri kene aru bandhi kene thakise amikhan etu niyom pora etiya mukti paise. Etu nimate likhi thaka purana niyom pora nohoi, kintu Atma laga notun jibon te amikhan sewa koribo nimate.

Paap Laga Kanun

⁷ Tinehoile etiya amikhan pora ki kobo? Kanun to paap ase naki? Kitia bhi nohobi. Hoilebi, jodi etu niyom pora nohoi koile, moi paap to najani bole thakise. Kelemanee niyom pora “Apuni lalos nakuribo” eneka likhi nai koile, moi lalos kora ki ase najani bole ase. ⁸ Kintu paap pora hukum kotha ki ase etu loi kene moike bisi lalos kori bole dise. Kelemanee, niyom nathakile, paap nijor to mori kene he ase. ⁹ Moi niyom nathaka age te ekbar to jinda thakise, kintu kitia hukum ahise, paap to arubi jinda hoise, ¹⁰ aru moi morise. Juntu hukum hisab te jibon anibole kotha thakisele, utu to ulta, moi nimate, mora he anise. ¹¹ Kelemanee paap pora etu hukum to loi kene moike thogaise. Aru hukum dwara moike morai dise. ¹² Etu karone niyom to pobitro ase, aru hukum to pobitro ase, aru dharmik aru bhal ase.

¹³ Tinehoile, ki bhal ase etu pora he moike mrityu anidise naki? Eneka hobo nadibi. Kintu etu paap pora, ki bhal ase etu loi kene moike morai dibole thakise. Titia hoile he paap to paap ase eneka janibo, aru paap to bisi biya ase eneka hukum pora dikhai dibo nimate thakise. ¹⁴ Kelemanane amikhan jane niyom to atmik ase, kintu moi gaw mangso laga ase. Aru moike paap laga sewkai te bikiri korise. ¹⁵ Nijor pora ki kaam kore, moi bujhi bo napare. Kelemanane moi ki itcha ase, etu moi nakore. Kintu ki moi ghin kore, etu he moi kori thake. ¹⁶ Jodi moi ki bhal napai etu he kori thake, titia niyom to bhal ase eneka moi nijor pora niyom kowa mani loi ase. ¹⁷ Etu karone ki kori ase etu etiya moi nohoi, kintu moi logote jivit thaka paap pora he ase. ¹⁸ Kelemanane moi laga gaw mangso logot te thaka to bhal eku nai, etu moi jani ase. Kelemanane ki hosa ase etu kori bole moi itcha ase kintu etu kori lobole takot he nai. ¹⁹ Kelemanane bhal kaam ki moi kori bole itcha ase, etu nakore, kintu ki paap moi kori bole mon nai, etu he moi kori thake. ²⁰ Etiya jodi moi kori bole mon nathaka kori ase koile, etu moi nohoi, kintu moi logot te jivit thaka paap pora he kori ase. ²¹ Etu hoile, moi bujhi pai ase, moi bhal kaam to kori bole itcha ase, kintu utu paap moi logote ase. ²² Kelemanane moi laga mon bhitor te thaka manu pora Isor laga niyom te khushi pai. ²³ Kintu dusra niyom ekjon pora moi laga gaw laga alag-alag bhag te ase. Etu pora moi laga bhabona logote lorai kori ase. Moi laga gaw laga bhag te thaka paap laga niyom pora moike bandi kene rakhe. ²⁴ Moi kiman dukh manu ase! Kun

pora moike etu mori bole laga gaw pora bachai dibo? ²⁵ Kintu Probhu Jisu Khrista dwara Isor ke dhanyavad diya ase! Etu karone, etiya moi nijor mon pora Isor ke sewa kori ase. Kintu, moi laga gaw, juntu mangso te ase, etu pora he paap laga niyom cholai ase.

8

Atma Te Jibon Ase

¹ Etu karone etiya kun Jisu Khrista te ase taikhan karone ninda kora eku nai. ² Kelemanee Jisu Khrista dwara, Jibon diya laga Atma laga niyom pora apuni khan ke paap aru mora laga niyom pora mukti di dise. ³ Kelemanee komjur te ki niyom kori bole para nai, etu Isor pora korise. Tai nijor Putro ke paap nimite boli kori bole, pura paap laga gaw mangso nisena koi kene pathaise, aru etiya Tai pora paap aru gaw mangso ke ninda kori dise. ⁴ Titia he niyom pora ki dorkar ase, etu amikhan logote pura hobo, kele koile amikhan gaw mangso hisab te naberai, kintu Atma hisab te he berai. ⁵ Kelemanee kun gaw mangso hisab te he thaki ase taikhan gaw mangso laga jinis te he mon rakhi ase, kintu kun Atma hisab te thaki ase taikhan laga mon bhi Atma laga jinis te he rakhi ase. ⁶ Gaw mangso te mon rakha to mora ase, kintu Atma te mon rakha to jibon aru shanti ase. ⁷ Kelemanee gaw mangso te mon rakha to Isor logot te dushman ase, etu Isor laga niyom te nathake, kelemanee etu thakibo napare. ⁸ Kintu kun gaw mangso te ase taikhan pora Isor ke khushi kori dibo napare. ⁹ Kintu eneka hoile bhi jodi Isor laga

Atma apnikhan logot thaki ase, titia apuni khan gaw mangso te nohoi, kintu Atma te ase. Kintu jodi kunba logot Khrista laga Atma nai, titia tai Khrista laga nohoi. ¹⁰ Kintu jodi Khrista apuni logot te thake, paap nimite gaw mangso to mori thakilebi, dharmikta nimite atma to jinda thaki ase. ¹¹ Jodi Jisu ke punoruthan kori diya Atma to apnikhan logote jivit thaki ase, titia kun pora Jisu Khrista ke punoruthan kori dise, Tai pora apuni khan laga mori bole thaka gaw te bhi apnikhan logote thaka Tai laga Atma dwara jibon dibo.

Khrista Logot Te Uttoradhikari

¹² Etu karone, bhai khan, gaw mangso laga itcha hisab te thaki bole amikhan etu laga dhaar luwa manu nohoi. ¹³ Kelemanee jodi apuni gaw mangso hisab te thaki ase koile, apuni mori bole ase, kintu jodi Atma hisab te thaki ase, titia gaw mangso laga kaam sob morai di ase aru apuni jinda thakibo. ¹⁴ Kelemanee kun Isor laga Atma pora cholai ase, taikhan sob Isor laga bacha khan ase. ¹⁵ Kelemanee apnikhan bhoi te giri jabole sewkai laga atma luwa nai; kintu apuni khan bacha laga Atma loise, kun dwara amikhan pora koi, "Abba!" ¹⁶ Atma nijor pora he amikhan laga atma logot Isor laga bacha khan ase eneka sakhi di ase. ¹⁷ Aru jodi amikhan bacha khan ase, tinehoile amikhan bhi Isor laga uttoradhikari khan ase. Aru amikhan mili kene Khrista logote uttoradhikari khan ase, jodi amikhan Tai logote dukh pai, eneka hoile amikhan bhi Tai laga mohima te hisa hobo.

Ahibole Thaka Mohima

¹⁸ Kelemanē amikhan ke dibole thaka mohima to etiya thaka kosto logote tulona kori bole eku nai. ¹⁹ Kelemanē sob sristi to Isor laga bacha khan ke dikhibo laga ekdom rukhibo napara hoise. ²⁰ Sob sristi to misa misi thakibo diya nisena he hoise, taikhan laga khushi pora nohoi, kun he taikhan ke eneka rakhidise, ekta asha karone. ²¹ Titia sristi laga jinis khan bhi puchija te bandi thaka pora khuli kene Isor laga bacha khan laga mohima te mukti pabo. ²² Kelemanē pura sristi eke logote bacha jonon dibole dukh pa-a nisena etiya tak bikhai ase. ²³ Aru sristi khan ekla nohoi, kintu amikhan kun Atma laga prothom phol hoi jaise- amikhan nijor bhi pali luwa khan hobole nimite bisi itcha hoi kene dukh te rukhi ase, etu amikhan laga gaw mangso pora mukti pabo nimite. ²⁴ Kelemanē etu asha te he amikhan ke bachai loise. Etiya asha ki dikhibo pare etu to asha nohoi. Kelemanē ki dikhi ase ta te kun pora asha koribo? ²⁵ Kintu jodi amikhan pora ki nadikhe etu karone asha korile, etu karone amikhan pora dhorjo kori kene rukhi thake.

²⁶ Kintu etu nisena he, Atma pora amikhan komjur te modot kore. Kelemanē ki nimite prathana koribo etu amikhan pora najane, kintu Atma nijor pora kobo napara kotha pora Isor usorte amikhan karone mangi di thake. ²⁷ Kintu kun pora mon bisari ase tai pora he Atma laga mon bhi jani ase, kelemanē Atma pora pobitro manu khan nimite Isor itcha thik te anurodh kori ase. ²⁸ Aru kun pora Isor ke morom kore, kun Tai laga udeshe kaam ekta te mati kene ase, etu

khan nimite Isor pora sob jinis to bhal ekta ulabo nimite kori diye, eneka amikhan pora jani ase. ²⁹ Kelemanee age pora kun Tai jani thakise, Tai chokra nisena hobole basi loise, taikhan ke mati loise titia bhai khan sob majot te tai he prothom jonon huwa hobo. ³⁰ Aru Tai pora kunkhan ke age pora basi loise, taikhan ke mati loise. Aru Tai pora kunkhan ke mati loise taikhan ke thik hobo dise. Aru kunte thik hobo dise, taikhan ke mohima bhi kori dise.

Isor Laga Anonto Morom

³¹ Tinehoile etu jinis sob nimite amikhan pora ki kobo? Jodi Isor amikhan phale ase koile, kun pora amikhan logot bhirodh te ase? ³² Tai jun pora Tai nijor bacha ke bhi nachari kene amikhan sob karone bolidan dibole nimite pathaise, tinehoile tai laga sob jinis amikhan eku daam natirai kene nadibo? ³³ Jun manu pora Isor basi luwa manu khan ke ninda kori bole paribo? Isor he taikhan ke bisar koribo. ³⁴ Kun pora doshi dibo paribo? Jisu Khrista ase morija to- hoilebi etu pora bhi dangor to, mora pora jinda hoi kene- Isor laga dyna phale bohi kene, amikhan nimite prathana kori ase. ³⁵ Kun he Khrista laga morom para amikhan ke alag koribo pare? Dukh khan pora naki, nahoile kosto, na bhuk, na dukh, namaribole bhoi naakal, nahoile talwar? ³⁶ Eneka likha thaka nisena, “Apuni khan nimite amikhan hodai din somoi sob te morai ase. Mer khan kati bole loija nisena he amikhan ke loijai ase.”

³⁷ Kintu etu jinis sob te kun pora amikhan ke morom kore Tai द्वारा amikhan jiti ase. ³⁸ Kelemanе moi thik jani ase, mora hoilebi jinda hoilebi, sorgo duth hoilebi, sorkar-raj hoilebi, etiya thaka jinis khan hoilebi, ahi thaka jinis khan hoilebi, takot khan hoilebi, ³⁹ untcha hoilebi, niche hoilebi, sristi kora sob te, eku pora bhi Jisu Khrista te Isor laga morom pora amikhan ke alag koribo na paribo.

9

Isor Itcha Te Basi Luwa

¹ Moi Khrista te hosa kotha koi ase. Moi misa nokoi; Pobitro Atma logote moi laga bhiton atma pora moike sakhi di ase, ² narukhi kene moi laga monte hodai dukh aru kosto bukhi ase. ³ Kelemanе mangso phale, moi nijor laga bhai khan nimite moike shrap hoi kene, Khrista pora alag kori dile bhi etu to moi laga itcha ase. ⁴ Taikhan Israel manu khan ase. Taikhan pali-luwa bacha ase, aru mohima, kosom pora diya niyom, aru niyom laga uphar, aru Isor ke aradhana kora, aru kosom diya vachan sob taikhan logote he ase. ⁵ Taikhan laga baba laga khandan pora he Khrista ahise, mangso hisab te- Jun sob uporte Isor ase. Hodai karone Taike aradhana hobo dibi. Amen.

⁶ Kintu Isor laga kosom khan to hari ja nohoi. Kelemanе Israel pora aha khan sob to Israel jati pora aha nohoi. ⁷ Aru sob to Abraham laga asol bacha khan nohoi. Kintu "Isaac द्वारा tumi laga khandan laga naam hobo." ⁸ Etu motlob to, gaw mangso pora aha khan Isor laga

bacha nohoi. Hoilebi jun bacha Isor laga kosom pora jonom hoise taikhan he Isor laga bacha khan ase. ⁹ Kelemanee kosom te eneka koi kene ase: "Aha saal eneka somoite, moi ghurai kene ahibo, aru ekjon bacha Sarah ke dibo." ¹⁰ Khali etu he nohoi, kintu kitia amikhan laga baba Isaac dwara Rebekah bhi pet te bacha bukhi se-¹¹ taikhan jonom nohoi kene thakise aru biya bhal eku nakora age te, etu pora he Isor pora basi luwa hisab te aru Tai laga itcha he hobo karone, ¹² kaam hisab te nohoi, kintu Tai kun pora mati ase - aru taikhe eneka koise, "Dangor pora chutu ke sewa koribo." ¹³ Likha thaka nisena: "Jacob ke moi morom korise, kintu Esau ke moi ghin korise."

¹⁴ Tinehoile amikhan pora ki kobo? Isor logote adharmik ase naki? Kitia bhi eneka nohoi. ¹⁵ Kelemanee Tai pora Moses ke koise, "Moi daya kora khan uporte daya koribo aru morom kora khan ke morom koribo." ¹⁶ Etu karone, manu khan laga itcha pora nohoi, aru kosis kora pora nohoi, kintu Isor kun logote daya ase Tai laga itcha pora he ase. ¹⁷ Kelemanee Shastro pora Pharoah ke koise, "Etu nimate he moi tumike uthai dise, titia tumikhan uporte moi laga hokti dikhai dibo, aru eneka moi laga naam prithibi sob jagate janai dibo." ¹⁸ Etu karone, kun logote Isor pora daya kori bole itcha ase, taikhe daya kore, kintu jun uporte Tai mon tan kori dibole itcha kore, taikhan ke mon tan kori bole diye.

¹⁹ Titia apnikhan pora moike hudibo, "Kile etiya bhi Tai golti pai ase? Kun pora Tai laga itcha ke rukhabo parise?" ²⁰ Kintu, O manu, Isor

pora itcha kora kaam te alag jowab dibole manu tumi kun ase? Ki saman hath pora bonaise etu saman pora bona manu ke, “Apuni kele moiike eneka bonaise eneka kobo pare naki?” ²¹ Kumar ekjon pora ki kolsi bona bole itcha ase, etu bonabo nimate mati uporte tai adhikar nohoi? Aru eke mati pora kolsi ekta sonman nimate aru dusra ekta mamuli te chola bo nimate bona bole tai adhikar ase nohoi? ²² Kintu, jodi Isor he Tai laga khong dikha bole aru Tai laga hokti jonai dibole nimate itcha thakise, etu pora he Tai kolsi kunkhan nosto kori bole bonaise, eitu khan ke dhorjo korise koile? ²³ Jodi Tai pora etu kora Tai laga dhun laga mohima, kolsi khan uporte daya dikha bole korise koile, kun to Tai age pora mohima nimate bonai kene rakhidise? ²⁴ Aru jodi Tai pora etu korise, amikhan nimate jun khan ke Tai mati loise, khali Yehudi khan majot nohoi kintu Porjati khan majot pora bhi? ²⁵ Hosea kitab te Tai pora koi ase:

“Kun Moi laga jati thaka nai, Moi taikhan ke Moi laga manu khan eneka matibo,

Aru kun age te morom napai kene thakise, taikhe morom kora khan eneka matibo.

²⁶ Aru etu jagate taikhan ke eneka bhi kobo, ‘Tumikhan moi laga manu nohoi,’

Ta te taikhan ke, “Jinda Isor laga bacha khan eneka matibo.’ ”

²⁷ Aru Israel nimate Isaiah jor pora awaj chilai kene koi ase,

“Israel bacha khan samundar laga balu nisena bisi thakile bhi,

Khali basi kene thaka olop jon khan ke he bachabo,

²⁸ Kelemanе Probhu pora prithibi uporte Tai laga kotha deri nohoi kene joldi kaam kori lobo.”

²⁹ Aru Isaiah pora koi thaka nisena,
 “Jodi sorgo Probhu pora amikhan nimate khandan rakhi diya nai koile,
 Amikhan bhi Sodom aru Gomorrah nisena he hobo asele.”

Israel Laga Abiswasi

³⁰ Tinehoile, etiya amikhan pora ki kobo? Dharmikta jun to biswas pora pai, etu Porjati khan, kun pora dharmikta hobole bisara nai, taikhan pora he paise naki? ³¹ Kintu Israel, kun he niyom pora dharmikta hobole bisarise, taikhan etu ke niyom dwara pa-a nai naki? ³² Kile huwa nai? Kelemanе taikhan pora etu biswas pora bisara nai, kintu kaam kora pora he pabo eneka bhabise. Taikhan theng lagija pathor te lagi jaise, ³³ eneka likha thaka nisena,
 “Sabi, Moi Zion te thogar kha pathor ekta rakhidi ase; aru kun pora Taike biswas kore,
 Tai kitia bhi sorom nahobo.”

10

¹ Bhai khan, moi laga monte itcha aru taikhan nimate Isor usorte prathana kora to taikhan poritran pabo nimate ase. ² Isor nimate taikhan mon juli thaka to moi bhi sakhi di ase kintu thik buddhi pora kora nai. ³ Kelemanе, taikhan Isor laga dharmikta najane, aru taikhan nijor laga dharmikta bona bole kosis korise. Taikhan

to Isor laga dharmikta te nijor jibon diya nai. ⁴ Kelemanee kun he biswas kore taikhan laga dharmikta nimite Khrista he niyom ke pura korise.

Sob Nimite Poritran Ase

⁵ Kelemanee Moses pora likhise dharmikta to niyom pora he ahe: “Kun manu niyom kowa khan kori ase, tai etu pora jinda thakibo.”

⁶ Kintu biswas pora aha laga dharmikta pora etu koi ase, “Tumi laga monte eneka nakobi, ‘Kun sorgote uthijabo?’ (Etu ase, Khrista ke nami anibo karone); ⁷ aru nohoile eneka nokobi, ‘Kun norokte nami bo?’ ” (Etu ase, Khrista mora pora jinda uthaikene anibole). ⁸ Kintu etu pora ki koi ase?

“Kotha to apuni usorte he ase.”

Etu biswas laga kotha ase, jun to amikhan prochar kori ase.” ⁹ Kelemanee, jodi apuni laga mukh pora Jisu ke Probhu eneka shikar korile, aru apuni laga monte Isor pora Tai mora pora jinda uthai dise eneka biswas korile, titia hoile apuni poritran pabo. ¹⁰ Kelemanee monte biswas kora pora ekjon dharmik hoijai, aru mukh pora shikar korile poritran pai loi. ¹¹ Kelemanee Shastro te eneka likha ase, “Kun pora taikhe biswas kore, taikhan kunte bhi sorom nadibo.”

¹² Kelemanee Yehudi aru Yunani majote eku alag nai. Kelemanee Probhu to sob laga Probhu ase, aru kun pora Taike mate, taikhan sobke Tai laga dhun di ase. ¹³ Kelemanee kun pora Probhu laga naam mati ase taikhan sob poritran pabo.

¹⁴ Kintu taikhan pora biswas nakora ekjon laga naam kineka matibo? Aru kitia bhi nahuna

ekjon ke taikhan kineka biswas koribo? Aru kunba pora prochar nakorile taikhan kineka hunibo? ¹⁵ Aru taikhan ke napathaile, taikhan kineka prochar koribo? - Likha thaka nisena, “Bhal khobor prochar kora khan laga theng kiman bhi sundur ase*!”

¹⁶ Kintu taikhan sob pora susamachar laga kotha mana nai. Kelemanee Isaiiah koi ase, “Probhu, amikhan prochar kora huni kene kun biswas korise?” ¹⁷ Etu karone huna pora he biswas ahe, aru Khrista laga kotha prochar kora pora hunibo pai. ¹⁸ Kintu moi hudi ase, “Taikhan pora huna nai naki?” Hoi, hosa taikhan pora hunise.

“Prithibi sob jagate taikhan laga awaj jai jaise, Aru taikhan laga kotha pora duniya laga sob kona tak punchise.”

¹⁹ Kintu moi hudi ase, “Israel pora buja nai naki?” Moses pora prothom te koise, “Moi juntu desh bhi nohoi, eitu khan dwara tumikhan ke suku jola bole dibo.

Nabuja laga desh pora tumikhan ke khong uthi-bole dibo.”

²⁰ Titia Isaiiah mon dangor hoi kene eneka koise, “Kun pora bisara nai taikhan pora Moike pai loise.

Kun pora huda nai taikhan logote Moi nijor dikhai dise.”

²¹ Kintu Israel laga eneka koi ase, “Pura dinte Ami kotha namana aru jhagara kora manu khan uporte hath uthaikene thakise.”

* **10:15** 10.15 Isa. 52:7; Nah. 1:15.

11

Isor Pora Bachai Luwa Israel Manu

¹ Moi koi ase titia, Isor pora Tai nijor manu khan ke ninda korise naki? Kitia bhi nohoi. Kelemane moi nijor bhi Israel manu ekjon, Abraham laga khandan aru Benjamin laga jati laga ekjon ase. ² Isor pora Tai nijor manu kunkhan ke Tai age pora janikena thakise taikhan ke ninda kora nai. Apnikhan pora Shastro te Elijah pora Isor ke Israel bhirodh te ki anurodh korise etu jana nai naki? ³ “Probhu, taikhan pora apuni laga bhabobadi khan ke morai dise, taikhan apuni laga girja laga saman rakha khan bhangai dise. Moi ekla he bachi jaise, aru etiya taikhan moike morai dibole bisari ase.” ⁴ Kintu Isor taike ki jowab dise? “Ami nijor nimate sath hajar manu rakhi kene ase jun khan jhukikena Baal ke puja kora nai.” ⁵ Etiya bhi eneka he ase, etiya laga somoite bhi bisi komti manu ke he basi se Isor laga kripa pora. ⁶ Hoile bhi jodi etu anugraha pora hoi, tinehoile etu to tai laga kaam pora nohoi. Nohoile kripa to kripa nohoi jabo. ⁷ Tinehoile ki ase? Israel laga manu khan ki bisarise, etu panai, hoile bhi Isor pora basi luwa manu khan etu paise, aru dusra manu khan to mon tan hoi jaise. ⁸ Pobitro kitab te likha nisena: “Isor pora taikhan ke murkho dimag laga atma dise, suku dise nadikhibo nimate aru kandise nahunibo nimate, aji laga din tak.” ⁹ Aru David koise,
 “Taikhan laga mez ke jhali aru phang hoi jabo dibi,
 Aru taikhan phasibo aru saja pabo.

¹⁰ Taikhan laga suku ke andhar hoi jabo dibi, titia taikhan eku sabo na paribo, Aru hodai taikhan laga komor niche kori kene thaki jabo.”

Porjati Khan Kolom Kori Luwa

¹¹ Etu karone moi hudi ase, “Taikhan giri jabole theng te thogar lagise naki?” Kitia bhi eneka nohoi. Kintu taikhan paapi howa karone poritran to Porjati khan logote ahi ase, titia Israel khan suku jolibo. ¹² Etiya taikhan paapi huwa to prithibi laga dhun nimate ase, aru jodi taikhan pora harai diya to Porjati khan laga dhun ase, titia taikhan pura hobole din ahile, kiman bisi dhuni hobo? ¹³ Etiya Porjati khan, moi apuni khan ke koi ase, jitia tak moi Porjati nimate apostle kaam kori bole dise, eneka moi laga kaam te phutani kori ase. ¹⁴ Titia ji hoile bhi moi nijor gaw mangso laga Yehudi khan ke suku julibole dibo. Titia taikhan majot te kunba to bachai lobo pare. ¹⁵ Kelemanee jodi taikhan ke chari diya motlob prithibi logot mil-milap hoile, titia taikhan pora grohon kora to mora pora jibon pa nohoi? ¹⁶ Kintu jodi prothom phol to pobitro ase, tinehoile etu nimate diya maida bhi pobitro ase. Aru jodi ghas laga shikor to pobitro ase koile, daal sob to pobitro ase. ¹⁷ Kintu jodi kunba daal ke bhangai diye, aru jodi apuni, kun jongol laga oliv ghas ase, kolom kori kene dusra majot te bandhi dise, aru taikhan logote oliv ghas laga shikor logote eke hoise, ¹⁸ tinehoile dusra daal usorte phutani na koribi. Kintu jodi apuni phutani kore koile etu yaad koribi, shikor ke

modot diya to apuni nohoi, kintu shikor pora he apuni ke modot di ase. ¹⁹ Titia apuni kobo, “Daal kunba bhangi ja to moike kolom kori lobole nimite he thakise.” ²⁰ Etu thik ase. Taikhan laga abiswas pora taikhan bhangi jaise, kintu biswas pora apnikhan mojbut te khara koridi ase. Etu karone nijorke dangor nabhabi bhi, kintu bhoi koribi. ²¹ Kelemanee jodi Isor pora asol ghas laga daal ke nabachaile, apuni ke bhi nabachabo. ²² Etu karone, Isor pora morom laga kaam kora to jani lobi: bisi dangor dukh Yehudi khan uporte girise, kintu Isor laga daya apuni khan nimite hoise, jodi apuni khan Tai laga daya hisab te thakile. Nohoile apuni khan ke kati phelai dibo. ²³ Aru taikhan hoilebi, jodi taikhan laga biswas te nathakile bhi, taikhan ke kolom kori lobo. Kelemanee taikhan ke aru bhi kolom kori lobole Isor logot takot ase. ²⁴ Kelemanee jodi apnikhan, ene jongol laga oliv ghas pora kati loise, aru niyom nohoi kene pali thaka oliv ghas te kolom kori loise koile, titia etu Yehudi khan, jun khan he asol daal ase, taikhan ke anikena tai laga ghas te kolom nakoribo naki?

Bujhi bo Napara Israel Laga Poritran

²⁵ Kelemanee bhair khan, ki lukaikene ase, etu apuni khan najanikena thakibo dibo mon nai, kele koile apnikhan nijor bhabona te nijor to gyaani nisena nabhabibo le. Etu lukai kene thaka to Porjati khan kiman basi kene ase, taikhan purah nohua tak, olop somoi nimite Israel manu mon tan hoi jabole dise. ²⁶ Likha thaka nisena, Israel manu khan sob eneka bachai lobo:

“Zion pora Udhar-Korta ahibo.

Tai he Jacob pora Isor najana khan logote paap-khan hatai dibo,

²⁷ Aru taikhan laga paap moi kitia hatai dibo, taikhan logot te kosom etu hobo.”

²⁸ Susamachar hisab te hoile, apnikhan nimate he taikhan to apnikhan laga dushman ase. Kintu basi luwa hisab te hoile, taikhan laga baba khan nimate taikhan uporte morom dise. ²⁹ Keleman Isor pora diya uphar aru Tai pora mata to kitia bhi bodla-bodli koribo napare. ³⁰ Kineka apnikhan ekbar Isor kotha namana khan thakise, kintu etiya to Yehudi khan pora Isor kotha namana pora apuni Porjati khan daya paise, ³¹ aru etu nisena, Yehudi khan bhi kotha namana hoi kene ase. Aru apnikhan logote ki daya dise taikhan bhi etiya daya pabo nimate ase. ³² Keleman Isor pora manu sobke kotha namana te rakhidise, titia Tai laga daya to sob manu pora pabo.

³³ Oh, Isor laga buddhi, aru gyaan kiman bhi dhun aru bisi ase! Tai pora manu khan bisar kora aru Tai laga bera rasta kun pora bujhi bo!

³⁴ “Keleman Probhu laga monte ki ase etu kun he janibo, nohoile taike buddhi dibole kun ase?

³⁵ Nohoile kun pora poila Isor ke kiba dise, Junke Isor pora wapap tirabole lagibo?”

³⁶ Keleman sob bostu Tai pora ahise, Tai dwara hoise aru Tai karone he ase. Tai laga mohima hodai hobi. Amen.

12

Jinda Thaka Bolidan

¹ Etu karone, bhai khan, Isor laga daya dwara, nijor gaw to jinda thaka bolidan nisena dibole apnikhan ke anurodh kori ase, juntu pobitro hoi kene Isor pora bhal lagibo. Etu to apuni atma te aradhana kori ase. ² Etu prithibi laga itcha te monjur na koribi, kintu poribortan pora mon notun bonai lobi. Eneka hoile, apuni nijor pora Isor laga itcha to ki ase, ki bhal ase, aru ki thik ase etu jani lobo.

Anugrah Aru Uphar

³ Moi koi ase, kelemane moike anugraha dise, etu pora sob logote koi ase, apnikhan majot te kun manu pora bhi nijor ki ase etu pora dangor bhabona na koribi, kintu nomro hoi kene nijorke Isor pora kiman biswas dise, etu hisab te bhabona kori thakibi. ⁴ Kelemane kineka ekta gaw te alag-alag bisi bhag ase, aru bhag sob pora eke kaam nakore, ⁵ etu nisena amikhan bisi hoilebi, Khrista te ekta gaw ase, aru sob manu ekjon-ekjon laga bhag ase. ⁶ Kintu amikhan ke anugraha diya hisab te alag-alag bordan diya nisena, amikhan pora etu chola bo lage. Jodi ekjon ke bhabobani laga bordan dise, tai laga biswas hisab te chola bole dibi. ⁷ Jodi sewa kora ase, titia sewa kora kaam te chola bhi, kunke sikhai diya laga bordan dise tai etu kaam te chola bhi. ⁸ Jodi kunba laga bordan to manu khan laga mon uthai diya laga ase, tenehoile taikhan laga mon uthai di thakibi. Jodi kunba laga bordan to di thaka laga ase, taike di thakibo dibi. Jodi

kunba laga bordan to cholawta laga ase, taike hoshiar pora koribo dibi. Jodi kunba laga bordan to daya dikhai diya laga ase, taike khushi pora koribo dibi.

Hosa Khristan Laga Dagi

⁹ Morom to misa hobo nadibi. Ki biya ase etu ke ghin koribi; ki bhal ase etu ke dhuri lobi. ¹⁰ Ekjon pora ekjon ke bhai khan ke morom kora nisena kori bhi. Ekjon pora ekjon ke bisi sonman koribi. ¹¹ Mon itcha laga kaam te alsina koribi, atma te mojbud thakibi, aru Probhu ke sewa koribi. ¹² Asha te anond koribi, dukh te dhorjo koribi, aru prathana te hodai thakibi. ¹³ Pobitro manu khan karone dhun joma kori dibi aru modot kori bole bisaribi. ¹⁴ Kun pora dukh kosto di ase taikhan nimate asirbad dibi; kun pora shrap di ase, taikhan ke asirbad dibi. ¹⁵ Kun manu khushi hoi kene ase, taikhan logote khushi koribi, kanda khan logote kandibi. ¹⁶ Ekjon pora ekjon logote mil milap kori thakibi. Phutani na koribi, kintu nomro khan logote mili thakibi. Kitia bhi bisi jana nisena phutani na koribi. ¹⁷ Kunke bhi biya bodli biya nadibi, kintu sob manu age te ki sonman ase etu he kori bole bhabona koribi. ¹⁸ Jodi parile apuni laga takot hisab te sob logote shanti te thakibi. ¹⁹ Moi bisi morom kora bhai khan, kunke bhi biya bodli biya naghurabi, kintu Isor laga khong nimate chari dibi. Kelemanee eneka likha ase “ ‘Bodli ghurai diya moi laga ase; moi ghurai dibo,’ eneka Probhu he koi ase.”

²⁰ “Jodi apuni laga dushman bhuk lagi ase, khabole dibi.

Jodi tai pyaas lagi ase, taike pani khabole dibi. Keleman e neka kora pora apuni tai laga matha te jui julai diya nisena ase.”

²¹ Biya pora jiti bole nadibi, kintu bhal pora he biya ke jiti lobi.

13

Sorkar Laga Adhikari Khan Laga Kotha Mani Luwa

¹ Sob manu khan sorkar laga adhikari khan ke sonman kori bhi, keleman e Isor pora nadile, adhikari khan kun bhi nathakibo. Taikhan sobke Isor pora he sthapon kora ase. ² Etu karone kun pora adhikari manu khan laga kotha naloi; aru kotha namani kene bhirodh kore, taikhan nijor uporte bisar saja anibo. ³ Keleman e bhal kora khan nimite adhikar manu khan bhoi nakore, kintu biya manu khan nimite bhoi ase. Apuni adhikar manu khan ke bhoi nakori kene thakibo mon ase? Ki bhal ase etu he koribi, aru tai pora apuni to bhal ase eneka kobo. ⁴ Keleman e apnike bhal koribo nimite Tai Isor laga noukar ase. Kintu jodi apuni biya korile, bhoi koribi, keleman e Tai hathte talwar to ene dhura nohoi. Keleman e kun pora galti kore taikhan uporte Isor laga khong anibole Tai to Isor laga noukar ase. ⁵ Etu karone kotha mani bhi, khali Isor laga khong pora bachibo nimite nohoi, kintu nijor laga bhabona sapha hobo nimite. ⁶ Etu nisena bhabona sapha hobo nimite he apnikhan pora masul bhi di ase. Keleman e adhikar manu khan to eitu khan kori bole Isor laga nokorkhan ase. ⁷ Kunke dibo lage taikhan sobke dibi. Kunkhan

ke masul dibo lage, di dibi, kunkhan ke daam dibo lage di dibi; bhoi koribi kunke bhoi koribo lage, aru kunke sonman dibole lage, taikhan ke sonman dibi.

Morom Kora To Kanun Mani Thaka Ase

⁸ Kunke bhi eku baki narakhibi, kintu ekjon pora ekjon ke morom he kori thakibi. Kelemanee kun pora dusra ke morom kore tai to niyom pora ki koi ase etu tai pora purah kori loise. ⁹ Hukum te kowa nisena, “Bebichar na koribi, manu ke namorabi, chor na koribi, dusra manu laga bostu lalos na koribi,” aru dusra baki kotha kiman ase eitu khan sob yate he lagi kene ase: “Apuni laga ghor usorte thaka khan ke nijor nisena morom koribi.” ¹⁰ Morom to usorte thaka khan ke biya nakore, etu karone, morom pora niyom ke purah kori bole dise.

¹¹ Etu koribi, kelemanee amikhan ghumai thaka pora uthibole somoi hoise eneka amikhan jani ase. Kelemanee amikhan biswas kora din pora etiya to poritran amikhan laga usorte ahi kene ase. ¹² Rati to bisi lamba jai jaise, din to usorte ahi kene ase. Etu karone andhera laga kaam sob chari kene puhor laga hathiar pindhi lobo. ¹³ Dinte bera nisena amikhan thik berabo, modhu kha aru nisa huwa nohoi, bebichar nohoi, mangso laga itcha nohoi, jhagara aru suku jola nohoi. ¹⁴ Kintu Probhu Jisu Khrista ke pindhi lobi, aru gaw mangso itcha koribo nimite eku jaga nadibi.

14

Dusra Uporte Bisar Na koribi

¹ Kintu kun biswas te komjur ase, tai logote eku bisar kotha nadiyi kene, taike grohon koribi. ² Biswas thaka ekjon to sob khabo pare, kintu komjur thaka ekjon to khali pata-sata he khai. ³ Etu karone kun pora sob khai, tai pora ekjon kun eku nakhai taike ninda koribo nadibi; aru jun manu nakhai tai bhi kha ekjon ke bisar na koribi. Kelemanee Isor pora taike grohon kori loise. ⁴ Apuni kun ase dusra laga nokor ke bisar kori bole to? Tai nijor laga malik age te he tai khara korithake, nohoile giri thake. Kintu taike uthai dibo kelemanee, Probhu pora taike khara kori dibole pare. ⁵ Ekjon pora din ekta to dusra din pora bhal eneka bhabona kore, kintu kunba pora sob din to eke eneka bhabona kore. Sob manu pora nijor monte he thik biswas koribo lage. ⁶ Kun pora din alag ulaikene mani ase, tai Probhu laga naam te mani loi ase; aru jun manu khai ase, Isor ke dhanyavad diya nisena, Probhu laga naam te khai ase. Jun manu nakhai, Isor ke dhanyavad diya nisena Probhu laga naam te nakhabi. ⁷ Kelemanee amikhan kun bhi nijor nimite jinda nathake, nohoile nijor karone namore. ⁸ Jodi amikhan jinda thakile, Probhu nimite ase, aru jodi morile bhi, Probhu nimite he mori ase. Etu nimite, jodi amikhan jinda thakilebi morile bhi Probhu nimite he ase. ⁹ Etu nimite he Khrista mori jaise aru jinda hoise, titia he Tai jinda thaka khan aru mori kene thaka khan sob laga Probhu hobo. ¹⁰ Kintu apuni kele bhai khan uporte bisar kori ase? Aru apuni kele bhai khan ke ninda kori ase? Kelemanee amikhan sob Isor pora bisar korate khara koribo.

¹¹ Kelemanee eneka likha ase,
 Probhu he koise, “Moi jinda thaka tak,” sob Moi
 age te athukaribo,
 Aru sob manu nijor jiba pora Isor ke shikar
 koribo.”

¹² Etu karone amikhan sob nijor laga kaam Isor
 logot te janai dibo.

Dusra Ekjon Laga Theng Thogar Koribo Nadibi

¹³ Etu karone etiya pora amikhan ekjon he
 ekjon laga bisar nakoribo, kintu tai laga bhai
 laga theng nalagibo nimate, nohoile bhal laga
 rasta bondh nakoribo nimate monte rakhibo.

¹⁴ Moi jani ase aru Probhu Jisu naam te thik
 jani loise, sapha nohua jinis eku bhi nai, kintu
 kun pora nohoi eneka bhabona kore tai nimate
 sapha nohoi. ¹⁵ Kelemanee apuni ki khai ase,
 etu pora bhai laga mon jokhom kori dile, apuni
 morom te nathake. Apuni ki khai ase etu pora
 Khrista kun karone morise Taike nosto na koribi.

¹⁶ Etu karone ki bhal ase eneka apuni pora
 mani loi ase, etu biya nisena kobole nadibi.

¹⁷ Kelemanee Isor laga rajyo to kha luwa nimate
 nohoi, kintu Pobitro Atma te dharmikta, aru
 shanti aru khushi nimate ase. ¹⁸ Kun pora Khrista
 ke eneka pora sewa kore Isor ke bhi aru manu
 ke bhi khushi kore. ¹⁹ Etu karone, ki shanti ase
 aru ki pora mili kene ekjon-ekjon ke banabo pare
 etu bisaribi. ²⁰ Kha luwa nimate Isor laga kaam
 nosto na koribi. Sob jinis to hosa bhi sapha ase,
 kintu ekjon laga kha luwa pora jodi kunba theng
 lagi bole dise koile, titia etu to galti ase. ²¹ Jodi
 mangso aru angur ros kha nimate bhai ekjon
 ke theng lagikena, aru tai paap kori jai nohoile

komjur hoijai, tinehoile eitu khan nakhaile he bhal hobo. ²² Apuni laga ki biswas ase, apuni majote he rakhibi. Kun he nijor pora mani luwa sob te nijorke galti nabhabi, etu manu asishit ase. ²³ Kintu kunba pora jodi duita mon kori biya bhabona pora khai koile, etu nijorke ninda kori ase, kelemane etu to biswas pora nohoi. Aru ki biswas te nohoi, etu sob to paap ase.

15

Khrista Laga Dristanto

¹ Etiya amikhan jun takot te ase, khali amikhan nijorke khushi kori bole nohoi, kintu komjur pora giri thaka khan ke uthabole amikhan laga kaam ase. ² Amikhan sob pora nijor ghor usor khan nimite bhal kori kene taike uthai dibole aru khushi kori dibo lage. ³ Kelemane Khrista bhi nijorke khushi kora nai, kintu likha thaka nisena, “Apuni khan ke bodnam diya laga bodnam moi uporte girise.” ⁴ Kelemane age dinte ki likhise, etu sob aji amikhan ke jonai dibo nimite ase, titia Shastro laga kotha pora mon dangor hobo aru dhorjo kori kene asha thakibo. ⁵ Etiya dhorjo aru mon dangor kori bole diya Isor pora, Jisu Khrista logote kineka apuni khan mili loise, etu nisena he apuni khan sob majot te mili kene shanti te thaki bole dibi. ⁶ Titia ekta awaj te apnikhan eke logote amikhan Probhu Jisu Khrista laga Baba aru Isor ke mohima dibo. ⁷ Etu karone Isor laga mohima nimite Khrista pora apnike kineka swekar korise, etu nisena ekjon pora ekjon ke swekar koribi.

Yehudi Aru Yunani Laga Asha Khrista Ase

⁸ Kelemanee moi apnikhan ke koi ase, Isor he hosa ase eneka jonai dibole sunnot kora khan nimite Khrista nijor he noukar hoi jaise, eneka hoile, khandan baba khan logote ki kosom di thakise etu kori dibo. ⁹ Aru Porjati khan pora bhi Isor laga anugrah nimite mohima dibo. Likha te thaka nisena,

“Etu karone Porjati khan majote moi Apuni laga naam laga ke stuti koribo,
Aru Apuni laga naam te gana gabo.”

¹⁰ Aru bhi eneka koi ase,

“Probhu laga naam untcha koribi, tumi Porjati khan; sob manu Taike stuti koribi.”

¹¹ Aru bhi,

“Probhu ke stuti koribi, tumi Porjati khan;
Aru manu khan sob pora Tai laga naam uthaidibi.”

¹² Aru, Isaiah koi ase,

“Jesse laga khandan pora ekjon ahibo, Porjati khan majote bhi chola bole taikhe uthai dibo; tai logote Porjati khan asha thakibo.”

¹³ Biswas kora nimite apnikhan laga monte shanti aru khushi pora bhorta kori dibo, titia Pobitro Atma laga sakti dwara apnikhan asha te mojbuto hobo.

Porjati Khan Nimite Paul Laga Porisorja

¹⁴ Kintu moi nijor bhi apnikhan, ami laga bhai khan nimite khushi ase, kelemanee bhal niyom pora bhorta hoi kene aru gyaan-buddhi thik pora apnikhan ekjon he ekjon ke sikhai dibo pare. ¹⁵ Kintu apnikhan pora yaad koribo nimite Isor pora moike diya anugrah te himot kori kene apuni khan ke moi likhi ase. ¹⁶ Isor laga

susamachar laga noukar hobole, ekjon purohit nisena, Porjati khan majot te Jisu Khrista ke jonai diya kaam kori bole Isor pora moike etu uphar dise. Titia Porjati khan pora daan diya to Isor usorte Pobitro Atma dwara sapha kori diya hoise. ¹⁷ Etu karone Jisu Khrista dwara moi Isor laga kaam juntu korise etu te phutani kori bole dorkar ase. ¹⁸ Kelemanee Porjati khan pora Isor ke bhoi kori kene kotha mani lobole Khrista pora moi dwara kori dise, etu laga bahar te moi dusra kotha eku nakobo. Etu jinis khan to kotha aru kaam khan pora hoi thake, ¹⁹ aru chihna aru Pobitro Atma dwara asurit laga kaam pora. Etu karone, Jerusalem pora shuru hoi kene Illyricum jaga sob phale moi Khrista laga susamachar loijabo nimite hoise. ²⁰ Aru etu nisena Khrista laga naam nahuna sob te susamachar prochar kora to moi laga kaam eneka bhabona kori kene kaam korise, nohoile to dusra pora kori thaka bhetimul te moi kaam kora he hobo. ²¹ Kintu eneka likha nisena:

“Tai laga kitia bhi nahuna khan pora Taike dikhibo, aru kunkhan pora Tai laga eku hunai, taikhan pora bujhi bo.”

Rome Te Jabole Paul Laga Bhabona

²² Etu nimite he bisi bar moi apnikhan usorte ahibole thaka pora rukhi thakise. ²³ Kintu etiya, moi nimite etu jaga khan te thaki bole jaga nai, aru moi ahibole itcha kori kene bisi saal hoi ase. ²⁴ Moi Spain te ja somoite apnikhan ke lok kori bole asha ase, aru olop din eke logote thaka pichete moi yaatra ja somoite apnikhan pora modot dibo. ²⁵ Kintu etiya to moi Jerusalem

te biswasi khan nimite modot loi kene jai ase. ²⁶ Kelemaner Jerusalem te thaka biswasi khan majot te dukhiya khan nimite modot pathai dibole, Macedonia aru Achaia te thaka khan pora bisi khushi pora itcha thakise. ²⁷ Taikhan etu kori bole bisi khushi pai thakise, kelemaner etu taikhan ekta baki thakisele. Jodi Porjati khan pora taikhan laga atmik asirbad bhag korise koile, titia prithibi laga jinis, dhun sompoti aru taka-poisa asirbad khan loi kene taikhan ke sewa koribo lage. ²⁸ Etu karone ki joma kori kene taikhan ke dibole anise, moi kitia etu kaam khotom hobo, moi apnikhan ke lok kori kene Spain te jabo. ²⁹ Moi jani ase, kitia moi apnikhan logote ahibo, titia Khrista laga asirbad sob loi kene ahibo.

³⁰ Probhu Jisu Khrista aru Tai laga morom, Tai laga Atma dwara apuni, bhai khan, mili kene moi nimite Isor usorte prathana kori bole moi apnikhan ke anurodh kori ase. ³¹ Moi nimite prathana koribi Judea te thaka abiswasi khan hath pora moike bachai lobo nimite aru Jerusalem te thaka pobitro manu khan pora moi laga kaam to swekar koribo nimite. ³² Titia Isor laga itcha te moi khushi pora apnikhan usorte ahibo aru apuni khan majot te khushi pabo. ³³ Isor laga shanti apnikhan logote thakibi. Amen.

16

Salam Kotha

¹ Cenchrea girja te thaka amikhan laga bhoini Phoebe nimite moi sakhi di ase, ² apnikhan

pora Probhu naam te taike pobitro manu nisena swekar koribi, aru apnikhan pora tai ki modot lage, sob te modot dibi. Kelemanee tai to bisi manu ke modot korise, aru moi nijor karone bhi tai bisi modot thakise.

³ Jisu Khrista te moi logot eke kaam kora Priscilla aru Aquila tai duijon ke salam jonabi, ⁴ kun pora moi laga jibon nimite nijor laga jibon khatra te rakhidise. Taikhan ke khali moi pora he nohoikena Porjati laga girja sob pora dhanyavad di ase. ⁵ Taikhan ghor te girja ghor ke salam jonabi. Moi laga morom thaka Epaeetus, kun Asia te Khrista laga prothom phol ase, taike bhi salam jona bhi. ⁶ Mary ke bhi salam jonabi, kun he apnikhan nimite bisi kaam korise. ⁷ Andronicus aru Junias ke bhi salam jona bhi, kun moi nisena Yehudi aru moi logo bandhi ghor te thakise. Apostle khan pora bhi taikhan ke jani ase, aru moi laga age taikhan Khrista te thakise. ⁸ Probhu naam te moi laga morom thaka Ampliatus ke bhi salam jona bhi. ⁹ Eke logote Khrista te kaam kora Urbanus, aru moi laga morom thaka Stachys ke bhi salam jona bhi. ¹⁰ Khrista ke loi kene thaka, Apelles ke bhi salam jonabi, aru Aristobulus laga ghor te thaka sobke bhi salam jonabi. ¹¹ Eke Yehudi manu thaka Herodion ke bhi salam jona bhi. Probhu logot thaka Narcissus laga ghor manu khan sobke bhi salam jonabi. ¹² Probhu naam te kaam kora Tryphaena aru Tryphosa ke salam janai dibi. Morom thaka Persis ke salam jonai dibi, kun pora Probhu laga kaam bisi korise. ¹³ Probhu naam te basi luwa Rufus aru tai ama,

kun he moi laga ama bhi thakise, taikhan ke salam jonabi. ¹⁴ Asyncritus, Phlegon, Hermes, Patrobas, Hermes, aru bhai khan kun taikhan logot ase sobke salam jana bhi. ¹⁵ Philologus, Julia, Nereus aru tai laga bhoini, aru Olympas, aru biswasi manu khan sob kun taikhan logote ase, sobke salam jonai dibi. ¹⁶ Ekjon pora ekjon ke pobitro laga chuma dibi. Khrista laga sob girja khan pora apnikhan ke salam janai ase.

Hekh Janoni Diya Aru Salam

¹⁷ Etiya bhai khan, ami laga kotha bhal pora huni bhi, jun khan apuni khan majote dushmani nohoile bhi rasta bondh kori diye, aru apuni khan ke sikhai diya kotha khan laga bhirodh te kori diye. Eneka manu khan pora ghurai lobi. ¹⁸ Kelemanane eneka manu pora amikhan Probhu Khrista ke sewa nakore, kintu nijor pet nimite he sewa kore, aru taikhan laga mitha aru sundur kotha pora najana manu khan ke thogai ase. ¹⁹ Kelemanane apnikhan pora Isor kotha mani luwa to sob manu pora jani ase. Etu karone moi apnikhan nimite khushi kori ase, kintu apnikhan bhal kaam nimite buddhi thaki bole moi itcha ase, aru biya kaam phale eku najana manu hobi. ²⁰ Shanti laga Isor pora deri nohoi kene apnikhan laga theng nichete Saitan ke pisi dibo. Amikhan Probhu Jisu Khrista laga anugrah apnikhan logot thakibi.

²¹ Moi logot eke kaam kora bhai Timothy pora salam jonai ase, aru moi nisena Yehudi manu Lucius, Jason aru Sosipater pora bhi salam jonai ase. ²² Moi Tertius, kun pora etu chithi likhi

ase, Probhu naam te moi bhi salam jonai ase.

²³ Gaius, kun logot moi thakise aru girja manu khan sob pora apnikhan ke salam jonai ase. Sheher laga bhorali Erastus aru amikhan bhai Quartus pora bhi salam jonai ase. ²⁴ Amikhan laga Probhu Jisu Khrista laga asis apnikhan sob logote thaki bole dibi. Amen.

²⁵ Aru etiya Taike, kun pora he apnikhan biswas te mojbut hoi kene khara kori dibo pare, Jisu Khrista laga susamachar moi prochar kora,

Kun to bisi yug nimite lukai thakise, kintu etiya etu hosa kotha to janai dise,

²⁶ Etiya etu hosa kotha to khuli dise aru bhabobadi khan pora likha dwara, anonto Isor laga hukum pora jati sobke jonai dise, titia he sob manu biswas kori kene kotha mani lobo.

²⁷ Etiya buddhiman Isor ke, Jisu Khrista dwara hodai nimite mohima hobi. Amen.

**Indian Standard Version (ISV) Nagamese
The New Testament in the Naga Pidgin language of
India: Indian Standard Version (ISV) Nagamese**

copyright © 2019 Bridge Connectivity Solutions

Language: Nagamiz (Naga Pidgin)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

PDF generated using Haiola and XeLaTeX on 21 Feb 2024 from source files dated 23 Apr 2023

302d590c-b57a-5734-9dcb-8a22ed7685c4